

皇朝通典卷十九

選舉

選舉制

武科

臣等謹按射爲六藝之一三代士人未有不能射

者射義所載諸侯歲獻貢士于天子天子試之于射宮中多者得與于祭中少者不得與于祭此後世武科以射試士其所由昉乎漢選六郡良家子給羽林期門唐長安中始置武舉又有翹關負重之選宋金迄明武舉相沿不廢我

朝八旗人士無不以善射著稱挽強命中之技所在
多有不僅如漢人應武科者始能射也至于取士
之制

國朝文武並重其武舉鄉會試悉視文科例會試及
順天鄉試則

欽派大臣閱箭各省鄉試則巡撫主之既以外場定其
優劣復以策論決其去留法至善也謹依次編輯
備武科之制焉

順治元年十月定武鄉會試年分武舉會試定于

辰戌丑未年各省武鄉試定于子午卯酉年凡京
衛武學官生遇鄉試年准一體赴試二年六月准
於十月舉行各直省武闈鄉試三年九月定武鄉

會試事宜

武鄉會試初九日試騎射十
二日試步射十五日試策論

又定武進

士衣頂

武進士衣頂第一甲一名武進士賞甲胄
撒袋刀弓矢鞞帶等物諸武進士衣頂照

文進士一體穿
帶並賞給銀兩

十二年九月

上諭國家選舉人材其襄治理文武允宜並重今科中式
武舉應照文進士一體殿試朕親行閱視先視馬步箭
後視策文永著為例屆期武舉人各於

天安門就試畢以卷送

午門外東直房讀卷官公閱進呈俟

御批一甲三名畢各赴內院公同填榜十四年正月

敕定官員恩詔廕子停上入監讀書改補武職十六年九

月

敕明年天下武舉再行會試以文闈再會試故也十月定

武舉

殿試讀卷傳臚俱照文場例十七年正月停武科技勇

奉

上諭武科取士拔其韜略諳通弓馬嫻熟者以備將才至
於開弓舞刀掇石俱屬虛文無益以後俱不必試二月
兵部再舉行會試

命內大臣及大學士監射永著爲例三月

上諭武闈取士原以遴選將材以資實用向來考試馬步
箭沿習舊例用高大之的較射以致軟弓小箭易于倖
中其用滿式弓矢者反不得合式殊非收羅材勇之意
以後鄉會考試馬箭用滿洲例射帽步箭亦照滿洲例
射尋常小的十八年十月兵部請

殿試天下武舉得

旨武闈已考過步箭及策論又經內試選定停止殿試

中其康熙七年定先試馬步箭後試策論八年定外省
武闈以學政爲閱卷官旋罷之十三年復武場技
勇之制二十八年三月兵部覆御史錢三錫請定
武闈條例以馬箭中三步箭中二者爲合式

上諭馬箭弓刀等項俱已合式惟因步箭中不及兩箭不
准合式似屬屈抑著再議尋議步箭雖未中式其射法
精善者亦准考取至此箭時應令內大臣都統內

閣大臣與兵部公同監射得

旨嗣後武鄉會考試馬箭以中四箭爲合式步箭以中一箭爲合式三十二年兵部題考試武舉一疏得

旨步箭大把以八十步爲則太遠善射之人多致遺棄嗣

後著改爲五十步以中二箭爲合式

武場事宜頭場試馬箭豎立三把各

離三十五步務要放馬跑圓三回九箭中四箭者合式馬箭不及額者不准入二場試步箭立大把以五十步爲則務要穀滿精優直衝把子中央者爲中如有撞中把子根把子旂者不准九箭中二箭者合式不及額者不准入三場試馬步箭外再試八力十力十二力弓八十觔一百觔一百二十觔刀二百觔二百五十觔三百觔石弓必開滿刀必舞花石必離地一尺爲合式三項內有能一二

項者准入三場三項全不能者亦不准入三場三場試策二道論一道 三十三年九

月

敕武闈應重外場十月

上閱視武舉騎射技勇

論不合式舉人許其效力再試

上曰天下武舉會試者或其人才可用騎射亦優而以不合式之故遺而不錄者有之朕意殊爲憫惜令兵部宣示有願效力再試者具呈候請旨再行考試遴選交火器營令其服習戎事於會試時照常考校旣悉知其人

亦便於拔取有超羣者卽與錄用三十六年十月

上御瀛臺紫光閣閱武舉騎射

上發五矢皆中

上曰今科落卷內安知無騎射俱佳而被遺者乎如其回

籍則已若有留此者令兵部察明復試四十八年五月

上諭考試武舉當擴其典以備錄用現今八旗監生爲護

軍驍騎者俱有入文場考試之例直隸各省綠旗營兵

千把總及年滿千總其中有通文理願入場就試者可

分別令就武鄉會試卽於其充伍爲弁之地就近鄉試

不必令回原籍尋遵

旨議定直隸各省綠旗營兵有通文藝願就武鄉試者于
充伍地方該營將弁申送巡撫一體鄉試不中者
仍令歸營又各營千把總及年滿千總門衛所千
總有願應會試者該督撫提鎮給咨赴部一體會
試不中者仍歸原職由兵丁千把中鄉會試願歸
職伍者聽六月

敕漢軍人等一體考試武舉武進士尋議定八旗漢軍內
務府無品筆帖式庫使由官學生補授之外郎閒

散人等有願考武生者該旗移送順天府考取八十名鄉試時所取武生并中書及部院衙門筆帖式廕生監生及監生之披甲護軍領催執事人員願應武鄉試者亦移送鄉試取中四十名如不中仍令當差會試取中八名照文場編合字號四十九年九月太原總兵馬見伯疏稱武經七書注解互異請選定一部頒行經部議駁尋請嗣後考試武生武童論二篇一題出論語孟子一題出孫子吳子及司馬法舊例鄉會試論一篇策二篇今改

出論題二策題一從之五十一年十二月定本省
現任官員子弟頂食兵糧冒濫入場之禁從御史
段曦請也五十二年十一月

上御暢春園內西廡閱試武舉騎射技勇選宋如柏等十
五人再以騎步射令善射侍衛等射畢

上親射二次每發皆中

諭大學士等曰近見直隸各省考取武進士額數或一省
偏多一省偏少皆因其不知弓馬武藝止憑文章取中
以致騎射嫺熟諳悉韜略之人多有遺漏嗣後考取武

進士不必拘定額數俟天下會試武舉齊集京師令該部將各省赴試到部武舉照例考試弓馬將合式武舉等實數查明預行奏明朕計省之大小人之多寡照考取文進士例按省酌定取中額數則學習武藝弓馬優長者不致遺漏矣十二月定新中武舉內弓馬不堪人材不及弓刀石不能者將監試取中之巡撫照文科場例議處從御史李景迪請也五十六年十一月定武場初七日爲始考試十三日入闈十四日編號點名十五日考試策論從府尹俞化鵬請也

雍正元年六月增滿洲武鄉會試兵部請武場鄉
會試錄仍照舊例刊刻進呈從之二年五月吏部
左侍郎史貽直請武鄉試亦照武會試設立好字
號各省考試之時將弓馬技勇漢仗好者另行記
註移送內簾先於好字號選取如不足額再將餘
卷選取得

旨允行其各省武鄉試或以好字號取中或以文章好取
中之處於武鄉試錄內註明以便查對七年九月各旗
副驍騎校前鋒馬兵人等赴順天府願應鄉試府

尹陳良弼以聞得

旨允行九年三月

敕各督撫所屬地方召募揀選人材壯健技勇可觀者百餘人咨送兵部奏聞候揀派官員訓練教習以備軍旅之用武生童生及鄉勇民壯等俱可入選每人本籍額外給與守糧一分以養贍其家口本人進京之時著督撫動支公用銀兩賞給路費十年三月

敕各省技勇可用之武舉令其充補經制馬糧十一年十月定會試武舉到部務取同考五人連名互結倘

三場有人冒名頂替令互結之人立時首出將頂替與本人拿送刑部治罪鄉試亦照此例從御史

無嫌朱士伋請也十一月

上諭武場鄉會兩試原期選俊儲材所以人材壯健技勇兼優者外場考試另編好字號並分別雙單令入內場再考試文藝比較取中以杜冒濫倖進諸弊本年武會試有頂替進場作弊者當經查出交部治罪又有人材技勇皆屬平常而考試大臣濫列好字號入場取中者現在查參黜革議處俾各知儆戒至於各省學臣考試